

嘉慶東流縣志

東流縣志卷十四

安徽池州府東流縣知縣吳箴修
溝洫志

縣之境自西南迄於東北其形斜袤長百四十里而贏東西之間廣者五十里狹者不及三十里截長補短約以開方之數當得方一里者三千有奇地多山多水度山陵川澤城郭宮室涂巷二而去一準方一里者爲田五百四十畝當得田八十萬畝有奇而縣定額田地不過九之一則地有遺利也其有遺利者何也小水則潦小旱則暵東乎而坐視之備不豫故也縣左山而右江

緣江之地利在洲數距里落者遠沮洳渙散不能支引以溉逢盛漲卽浸禾稼山泉不甚旺山農頗資之而不能遍給也農所最利者湖泊然湖泊皆山水所潴遇旱山水不下數十里皆平陸暑雨驟集又汪洋泛濫爲巨壑矣是故緣江之利宜防傍山之利宜塘宜堰瀕湖之利宜溝宜堰其大較也縣之民不見外事頗勤於農豈其莫知此術乎哉徒以具徒治竭其力非一家之所能勝接畛連阡其議非一人之所能定不得苟且目前邀幸天事此古者於遂人匠人稻人諸職旣詳其法必備其官而溝澮之制緣溝必有治溝之夫緣澮必有治

澮之夫所以順人情而曲爲之經理者無不至也前令
蔣綬志曰東流表裏江湖高原下隰五之一耳沮洳之
土水滂無常堯塉之區旱暵無恃有土者先事而預防
之民之福也自蔣君以來復六十年矣其間堤堰溝塘
之務所興所廢竟何如哉要之蓄洩之利則固有明徵
矣條舉其著者列之於篇

南新河在南門外知縣陳春開濬廣深各三丈迤邐數
十丈

北新河在北門外亦陳春開濬廣十丈深三丈長二百
餘丈

金天民新河記曰邑侯陳公以隆慶辛未宰東流甫三年政成民和百廢悉舉若建城垣築堤防遷山川壇新學宮徙便民倉建使院拓靖節祠開禮賢館設講武場此其更著者皆有碑以紀頌功德顧茲兩河之開尙缺記石子子民也親被其澤且深而使美之弗彰罪孰大焉用茲忘其固陋而敬爲之記曰爲政之要在安民安民之要興利祛害而已利興之難繼於日後者慮之弗遠者也害祛而僥倖於目前者憂之弗深者也夫子語子夏爲政曰毋欲速毋見小利恐其忽遠圖墮大計也東流爲南輔上游負羣山之

崇面大江之險江水西南來過小孤轉折經縣境而東不啻二百餘里第以近無支河曲港爲舳艫艤泊之地故帆檣上下舉由西江視吾邑爲僻區不知艤泊孔艱則商賈不便商賈不便則有無不通而舉邑坐受其困至於轉運軍儲尤爲國家重務建德居腹內亦必由此以通漕本縣江口一港通建德漕舟率至僅泊其中洪水不常風濤時作遺害叵測而舟與倉遠又牽輓之費不貲軍民兩疲是數者其關係於吾邑利害亦不少矣我朝建邑迄今二百年餘典符當事歷歷可稽也而竟莫爲之一理豈以利害爲未

切與抑亦身家之心重而憂國憂民之心輕與惟我
公負有爲之才直敢爲之氣當可爲之時下車以來
悉詢民隱凡可以爲民興一利祛一害皇皇焉如有
不及其慮之遠而憂之深用以定夫可久無窮之計
久矣甲戌秋城工旣竣廼躬視地利窮水源協謀僉
同子來趨事城之南導建德諸山谿之水注於南門
曰南新河廣深各三丈迤邐而長數十丈城北門之
外濬塞下湖紆引江水而滴之達於東門曰北新河
廣十丈深三丈環繞而長二百餘丈工始於乙亥春
正月終於夏四月計工價值倡率好義之民益以俸

貲未嘗徵民一錢役民一力而二河充然可以爲艤
泊之藪猗歟休哉南河之開也援引形勝萃聚於邑
之胸襟而山谿湖澤之利日益以通北河之開也國
計免夫摧溺之虞而軍民轉輸之費日益以省且創
興於城成之後旅泊者倚捍禦而愈安居集者遂交
易而不潰民之僦居而肆於河畔者未雨閭月烟突
相比帆檣相望而停憩者絡繹以至吳音楚語雜沓
相聞昔之僻區下邑將轉而爲巍然雄鎮矣公之於
民也豈非所謂興利祛害以定夫可久無窮之計者
哉公名春字生之號同宇浙杭仁和人曾祖大京兆

夏清集卷之四
虛庵公昔守吾池多惠政百姓至今祠之

按金氏此記可謂深悉利病今南北兩新河又成淤塞矣北新河引江水入寨下湖湖形本高又逼山麓地既窄隘江流倒漾勢易停淤且環城不過數里不能旁引支渠爲灌溉其利益亦少若南新河則口門本寬又上承仙人湖湖頗廣自湖以西屈曲達建德建德迤南之水皆萃焉每水漲時百斛船可直抵堯城渡誠得通利豈徒江路停泊者得避風濤之險而自建德以上山貨竹木之屬由建德達縣而出江勢甚便利商賈必趨之則江口走集可以擬於大通口

矣惟山水往往挾沙而下易於淤淺宜時時設法疏濬耳此時之急在乎廣開口門使其出之暢導冷水港以上使來水氣聚而勢猛度其地形建閘以節之濱湖築隄以衛之此利甚博瘠邑可富也第開濬港口施工非易患於費無所出而冷水港以上卽建德所治疏導上流勢須通力合作則又患於牽掣不前姑存其說俟有志者而已

柳堤在縣西南門外明知縣蕭珮築亘二百六十丈西北達江口拱北山下立閘以蓄湖水丁紹軾記乾隆十年知縣萬紹熙復修築職員徐堃等捐

按丁紹軾記無考

張公堤署知縣張叔珽築在縣治東門外

城南堤邑布政王應乾築

以上附城諸堤

溪山堰在縣南六十里圍水可灌田五六十畝

峽山口堰在縣南四十里曹溪保

西冲口堰俗云頭堰二堰小堰不一

龐村堰在縣南四十里

銅頂山堰在縣南五十里

江家堰在縣南四十里桂村坂

馬家堰在縣南四十里

當頭坂堰在縣南三十里下隅坂

芝蔴窟在縣南四十五里江家壩

圩堰坡在下隅坂

蓮華塘在縣南四十五里溉田百餘畝

天井塘在曹村坂溉田百餘畝

楊孫塘在縣南四十里唐豐上鄉 此從謝志蘇志補

池州府志同

雨頭塘在管山彭東界可溉田三十畝

李家陂在縣南三十里

玉家塘在縣南四十里

南塘在縣南五十里

西塘在縣南三十五里

何家塘池州府志卽雷源

巖塘在縣南二十五里池州府志作巖塘府志相近又有紫塘駝龍塘在縣南十里稠林磯溉田五十畝
花山塘在縣南四十里溉田七十餘畝

冷水塘在梅林山下俗名冷水窟泉流溉田數十畝

龐家塘在縣東三十五里龐村前溉田百餘畝

清水塘在縣東南四十里溉田百餘畝

馬家堰在縣南四十里浩村堰長數丈溉田二百餘畝
後坂堰在浩村堰長數丈溉田二百餘畝

劉家阪井在浩村溉田五十畝

香水井在縣西南四十里香山麓源出香山故名亦曰
香山塘可溉田數十畝

廉泉在中和保水旱不竭

以上唐豐上鄉

葛家塘在縣東三十里

真武塘在歷山北計弓三十餘畝塘口大石屹立天將
雨石卽生潤田家以此占之

兩頭塘在縣東

里建德東流兩邑分界處田三十

畝

白塘在縣東二十里

通泉溝在縣東三十里其源一出龍山一出鄞家井至
石橋合流深三尺濶五尺

白雲山泉出白雲山而分流居民引以溉田

以上唐豐下鄉

鄭家塘在縣東四十里東田

柯村塘在縣東四十五里

蒲塘在縣東北五十里水出石山四時不竭

大清一統志在東流縣東北五十里源出石人山溉田
二百餘畝

張家塘在縣東六十里

鵲兒塘

泉塘在龍山嶺北

長塘在縣東四十里

白泉塘在縣東四十里

雙塘在縣東四十里

新塘在縣東四十里

破塘在縣東四

羊角塘在六都山

鄭婆塘在六都山

蓮花塘在土蔭坂

燕子塘

東塘在石潭

大塘在石潭

羅漢塘在縣東六十五里

葛家塘在縣東北十五里晉陽鄉 從謝志補

九畝坂隔在六都山

南山隔在六都山

許家坂隔在六都山

獅子隔在縣東五十里

後山坂隔在石潭

五都隔在石潭

龍山隔在石潭

伍家隔在縣東四十五里

靈山堰在縣東五十里亦曰靈山港

曹冲堰在縣東五十五里

張釗灣堰在縣東六十里

蠡塘堰在縣東六十里

李家堰在縣東四十里

上橋堰在縣東四十里

古港在縣東三十五里東田

以上晉陽鄉

兩頭塘在縣北六十里天林莊

津塘在縣北六十里葉村

方塘在縣北七十里老村

以上維新鄉

東流縣志卷十五

安徽池州府東流縣知縣吳麓修

五行志

陰陽之理傳著人事以效其盛衰善否以爲休咎蓋五行者五常之氣之所形也故聖人著焉春秋時列侯不過百里而梓慎裨竈等占其吉凶歷歷可驗今一縣之地截長補短豈有以異於古諸侯哉而議者或謂一隅之地不足以應天氣抑失其理矣然梓慎裨竈輩世旣無有其師法又絕不傳不當牽合以蹈誣妄畧述水旱霜雪及物異可觀者著於篇備考覽焉

元至正二十六年東流縣獻芝

明成化十年甲午大有年

十四年戊戌夏不雨無稻禾

二十三年丁未夏大旱饑冬十二月雷電

宏治元年戊申大饑

正德十二年丁丑夏出蛟大水壞民田舍秋大疫

十三年戊寅夏大水冬十一月雷

十四年己卯冬訛言興

嘉靖十三年甲午冬十二月地震

二十四年乙巳夏六月大旱

二十五年丙午歷山生竹實萬石民採食之

四十年辛酉春地震

隆慶三年己巳六月大風拔木傷稼穡

五年辛未夏旱

萬歷二年甲戌夏六月大雨雷電出蛟拔木火雲布空
四望盡赤典史陳機出捕回經湖中舟裂而死

四年丙子大有年

八年庚辰建德出蛟山崩石裂平地湧水數丈大稜

十七年己丑夏旱大饑

二十七年己亥有年

三十六年戊申夏大雨米價騰涌民乏食

四十一年癸丑夏大水

天啟元年辛酉春久雪米貴自此始

崇正元年戊辰秋七月大潦穀不登

五年壬申春三月夜半有蛟自湖出江水湧十餘丈壞
在港官民船五百餘艘俗傳爲黃牛精

十年丁丑大饑民掘白土爲食

十一年戊寅大饑民食白土

十二年巳卯大饑

十三年庚辰夏大水是年民惑於竈降神自金陵而上

至本邑咸建醮迎後水湮中寢

十四年辛巳春正月蛟復出江湧水壞船夏大饑冬大饑民食榆皮土粉

十五年壬午春大饑民多死有攜食於道者則爭奪之
十六年癸未冬大雷電

十七年甲申日光摩盪

國朝順治四年丁亥春大饑夏大水

七年庚寅有年

八年辛卯大饑夏大雨

九年壬辰二月庚戌大潦湖水出江湧高丈餘丁巳地

震夏大旱田赤禾空

十年癸巳旱冬大雪雨木冰

十一年甲午正月朔地震有聲

十八年辛丑旱

康熙二年癸卯秋大水

三年甲辰冬彗星出東南數月

七年戊申六月夜地震

八年己酉四月朔日食十月初旬大雷雨雹

九年庚戌正月十八日雷大震冬大雪長江凍幾合匝

月不解

十年辛亥夏大旱冬不雨赤旱民大饑

十一年壬子夏四月十六日黎明大星起東方如月過處有霞有聲夏秋雨暘時若麥生四穗大有年

十二年癸丑冬寒雨雷電

十三年甲寅春多雨

十七年戊午六月至八月不雨大旱

十八年己未五月至八月不雨大旱

十九年庚申冬十月長星見西方如練起女虛入奎四十餘日

二十年辛酉秋八月地震有聲

身濟縣志 卷之十五 四
二十一年壬戌八月彗星見於角次於房經月乃沒

二十二年癸亥春大淋雨

三十二年癸酉秋大旱無穀棉花熟

三十六年丁丑大饑

四十六年丁亥大旱民饑

四十七年戊子陰雨連月大水民饑山川出蛟壞田廬
無筭

四十八年己丑旱大疫

四十九年庚寅夏大雨禾漂沒

五十年辛卯有年

五十一年壬辰有年

五十二年癸巳有年

五十五年丙申二月清明日避兵動搖數百里閱日乃
定大旱五月至九月乃雨江水泛溢盡沒田廬

五十六年丁酉二月宋沙灣檀上元妻洪氏一產三男
三月麥大熟

五十九年庚子有年冬大雪深數尺

六十年辛丑有年冬十二月雨木冰

六十一年壬寅有年

雍正元年癸卯夏大水

二年甲辰有年

三年乙巳大有年

四年丙午夏秋大水淹沒田廬

五年丁未六月初二日未時日食如夜移時乃復秋不
熟冬米價騰貴

六年戊申有年

七年己酉有年

八年庚戌大有年

九年辛亥大有年

十年壬子大水

十一年癸丑有年

十三年乙卯夏旱湖水盡竭秋大雨

乾隆元年丙辰有年

四年己未夏大旱

五年庚申有年

六年辛酉有年

七年壬戌大水

八年癸亥正月二十五日港口山水瀑湧壞官民船五

百餘艘淹斃人民數百十二月彗星見正月沒

九年甲子冬大雪

身沙果記 卷之三
十年乙丑春大雪

十一年丙寅有年

十二年丁卯有年

十三年戊辰八月十日夜有流星大如月自西而北過
處有聲

十五年庚午夏四月二十三日大雨雹

十六年辛未三月二十七日夜天赤夏米價騰貴

十七年壬申春苦雨民饑

十八年癸酉秋九月癸酉日戌刻有氣如虹看天色紫
白久而沒

十九年甲戌夏六月十二日大霖雨秋大水

二十年乙亥正月二十五日港口山水暴湧沉溺船隻
淹斃人民無數春久雨夏大水五穀不登冬十二月
雨木冰

二十一年丙子春米騰貴斗穀百四錢民食草木秋有
年十月十六夜地震有聲十一月朔雷雨大雪

二十二年丁丑大有年

二十三年戊寅夏登麥秋有年

二十九年甲申秋大水

三十一年丙戌水

三十二年丁亥秋大水

四十年乙未秋旱

四十一年丙申大水有物自建德河來由江口入江衝

裂河岸壞船無數俗傳黃牛精

四十六年辛丑秋旱

四十八年癸卯秋大水

五十年乙巳秋大旱

嘉慶七年壬戌秋旱

九年甲子秋大水

十五年庚午夏六月大風樹屋多拔折

十六年辛未有年

十九年甲戌秋大旱

二十二年丁丑秋七月二日雨雪平地寸許

東流縣志卷十五

東流縣志

卷之十五

五行志

八

東流縣志卷十六上

安徽池州府東流縣知縣吳簾修
藝文志上

余閱江南通志文苑傳大江以南搢筆飛翰者雲蒸霞蔚指不勝屈盛哉乎文明之化也東流之爲縣自南唐以來九百年矣而列於傳者僅得一人比至縣欲搜求古人金石文字以資掌故復渺不可得將風氣渾樸而致然歟然縣之士知自力於學者頗不乏所著述亦多彬彬可觀惜行之不遠莫爲採掇也備著其目後之輯通志者其無遺焉

周易本義

陳淑思著

周易質義四卷

汪思廼著自序曰夫易天地之奧區古今之秘府也聖人集義文之大成闡象象之精義繫傳十翼韋絕三編至矣紫陽釋詁諸經於詩傳自以爲無憾而於易則意不甚滿其答趙子欽書曰壁之燭籠添一條骨子則瘴一路光明豈不以易之爲義廣大悉備極天地古今之富靡不賅存於陰陽動靜老少變化之中而因非小備哉註所能窺萬一於語言文字者也

由漢已來言易者不下九十九家代及宋元諸儒叢
出講義盛行嗣是理數專門齊秦分弱非印版注疏
失之拘泥則拉雜諸家穿鑿附會而於經義罕有一
當也我 聖祖仁皇帝當體坤乾因心象畫苞羣聖
之經神條諸賢之傳說 欽定折中刊頒學校大哉
一哉世法世則矣臣廼恪守一經時懼有乖義例爾
以四書質義刊行坊人請以周易質義尾之而出廼
曰易之義不敢知易之書則有準周易折中至詳至
備盡善盡美綮千萬世而不容或軼者也惟是經生
識短才疎瞢然易今經部位而爲古本章程不無目

換而心忘且去其所爲講章將觀一卦一章而全旨
不貫觀一爻一節而順文不聯甚則苦繁重而隘行
厨絕依傍而少餽飭至於望洋思退俛俛若瞽之何
之也今是役也祇遵 欽定折中附以講章定式各
卦各爻各章各節悉仍今經本義提明全旨叙演順
文其各卦各爻各章各節之後詳載傳說庶幾居今
道古通變宜人既便于誦讀亦將廣爲刊行或無
戾於覃敷文教之至意也夫爰是敬謹鈔輯折中合
併講義名曰周易質義仍四書質義以爲言也若生
聖賢大備之後際經學昌明之期而曰吾茲有義可

質也是則未敢以云然也乾隆七年十月

周易存說

汪思廻著

尚書存說

汪思廻著

詩經存說

汪思廻著

曲臺存說

汪思廻著

春秋集解十二卷

吳應申著自序曰麟經千古特筆也文學如游夏一
辭莫贊何況餘子但其間善善惡惡或寓褒於貶寓
貶於褒變化離奇非得名儒點逗亦或以見嚴以立
法寬以待人之妙故讀經復讀傳者是也讀傳而復
讀諸子之說者亦是也應申世業春秋自左氏公穀
胡氏諸傳外間嘗覩縷衆說叅互而考究之然言人
人殊難定於一旦卷帙浩繁憊愚子弟復不能遍讀
經何由通矣是薈萃諸解釋其合於經指而前後貫
串者偏集成解意既一覽而知詞可計日而誦爲愚
魯者計甚便也或謂余私意去取不知諸儒立說皆

以解經旣於經旨有合一說猶衆說也豈在多哉

春秋存說

汪思廻著

四書質義

汪思廻著

增訂四書襯義

汪思廻著其自序曰四書六經之銷轄詒藉之嬖嬖其理隱而顯其言微而減其義蘊閎深其心神肅括立乎今日逆千百載而上設以其身潛尋沉味而有合焉自無不可得其意於有無字句之間漢唐以來

傳說分門注疏別派不下數十百家紫陽宗主元理
暢明二程張氏之說始集義既集註內從正外從闡
是非不謬於聖人而四書之旨粲然明白於天下後
世 國朝經學昌明超軼前代當湖而下發明章句
纂輯儒先各有師承互相祖述乾隆己未余有事四
書質義一書博考大全旁徵諸說一以涵泳本文爲
主本文合矣始及註註符矣始及他書爰於一章一
節一句一字依神註義順吻文言俾讀四子者依微
隱躍於有無字句之間誦其文玩其辭自得其義也
書成問世凡八年歲三易版矣爾以坊人請訂四書

視少之曰不登集註不列章旨節旨與夫人物典故
余曰讀四子者無不讀集註此書節註之意於視語
中一見豁然可以不備或者章旨節旨提於前補於
後雖各詳具思或學者之恍惚而莫知所歸宿也惟
是是書一章一節循經視義一字一句因文視言其
致力良苦其會意良深有無字句之間依微隱躍靡
不曲體註意宛味書神其於余質義一書涵咏本文
爲主有胎合無紕繆矣許之乃與蔣子念劬同心商
榷增訂成書並撮每卷中人物典故而摘其要於尾
以備參考用以爲是書詳其所不足亦以爲讀是書

者備其所有餘也時乾隆十一年夏五月

四書存說

汪思廻著

歷代帝王紀要

汪思廻著

世鑑篇二卷

陳嘉心著

堯擇品元八卷

汪思廻著自序曰五行有衰旺二氣有乘除天下之
相生相養而貽萬民無形之利者吉故趨之也天下

之相侵相尅而貽萬民無形之害者凶故避之也尅
擇之用大矣哉自五緯之說行而天下後世之僞治
詭襲聳人聽睹者百出其途以相混襲鈴布局失之
謬也遁甲壓勝失之荒也青囊蘊氣太乙移官失之
杳冥昏默而無稽也又其甚者卦例量天星盤換局
元空強紐乎天行宗廟硬區乎地力曾何當於五行
之元生扶有定二氣之品宿離不忒也哉夫先甲先
庚周文垂訓五行五紀箕子陳疇改卜載筆於春秋
吉戊咏歌於周雅外事以剛日內事以柔日后蒼傳
記典冊章章自古聖賢因天之時用地之利而天時

有生地利有宜夫誠不屑以禍福災祥之術啟生人
簣惑迷謬之心而其事存而不廢而其意深長可思
蓋嘗論之五行一陰陽也陰陽一太極也無極之真
二五之精五殊二實變化無窮子茲戴高履厚於混
然並處之中兩儀之象其陰陽之晶乎五行之秀其
理數之元乎君子修之吉小人悖之凶其剋擇之妙
乎推步於二氣五行之盈虛消息而晶華不乖於離
次元微弗罹於災稷先之而弗違後之而奉若吾惡
知順天者而或不祥逆天者而反爲福耶先是余少
時制舉餘暇間取剋擇通書諸本稍稍究心斗首顛

倒陰陽乖駁理度謬矣諸家橫推直列印板星辰得失叅半金精熬極六壬走馬畧邪五運六氣叅用八門而未知本始臚列九宮而未詳生剋制化之用信彼疑此迄無定衡年二十搜索經厨得先祖父手足剋擇要領運氣精言各數帙原本古先條分縷晰溯其源流判其去取示以用法而彼此宜忌不同刊以諄謬而歲時生剋互異排定二十四山神煞井井有條繪列十二月星晶明明有次旣各按依年月配合山方裝成八字圖式率乃編紀六十字天符歲會之年分別生氣財氣剋氣泄氣等局推天地之運行而

乘除飛伏準其晶華滙河洛之淵源而衰旺休生鉤
其元妙提綱舉要洞與通幽吉無不趨凶無不避蓋
自有剋擇以來未有兼綜羣書條貫萬象操禍福於
指掌瞭吉凶於眉端若斯之歷歷而不爽者也余不
睽敬爲條註詳加圖說用筆鈔輯彙爲一書名曰剋
擇晶元存之篋笥靳以自守耳比來游歷江淮謬爲
一二交知筮擇修營凡爲避貧病天絕之凶造富厚
多男之福無不用之立效如響應聲同人慕焉謀共
梓之余惟流前人之澤傳世行遠此固余之所不得
而辭也已復自念 天子愛養羣黎痼瘕在宥一時

天札瘥昏之患多方舛卹俾各出水火登衽席躋之
於仁壽之域 欽定協紀辨方一書頒行天下所以
爲民祈福者至矣是書也夫亦 聖世所有而不禁
也版成爲之說焉以叙其本末如此時乾隆二十五
年七月

地學薪傳二十卷

汪思迴著韓城劉輔清序之曰乾隆三十年春三月
幾望西嶽老人與中江過客相見於華陰廟市過客
跡之攀青柯躋白雲徂道於希夷之上班荆踏磴指
目見孫沐浴玉女洗頭盆談說金精鰲極事老人大

笑而詫之老人周遊天下名山大川七八十年矣所見異地所聞異時所見聞異口上下數千百歲茫茫漾漾一氣氤氲無之非無有而教有一過而成都成邑若若矣一過而爲墟爲屋若若矣撫高卑之位規流峙之形其曾勃蕩漾升降浮沈朗朗在人心目非虛空幻妄杳冥昏默一切標指見月病目疑華之爲物也春氣何穠夏氣何烈秋氣何澄冬氣何莫芸芸萬衆生息蠕動於大塊之中而不知天之包地者醞釀乎地又惡知地之承天者流示乎天若者高若者下若者陵谷滄田此天也地也此地也天也一氣也

一理焉已矣少焉春風有脚暮靄無聲老人與客散步危巘絕壑之間瞻顧川原睢盱遠邇相視而笑客舉所著地學而爲印証一原解指明五行真僞一圖說分別三合去求次綱領龍穴砂水葬法畢備次精言巒頭理氣局式悉詳其下十餘卷自青囊開宗葬經闡傳與夫卜楊曾廖已來諸先哲傳書詳確疏注最後又以手定平洋心法陽宅金鏡羅經解畧六卷次第商榷老人點頭拊掌聽然而嘯曰嘻地之爲學也三才一囊四經一奧非難非易至庸至奇漢唐而後異說紛鳴正傳滅汨非一人一時之爲矣逞其邪

臆而不識其由來誦其成書而莫究其原本勦說星
形印板山澤嘈嘈唧唧皆煨燼劫灰耳我客神通而
意貫之崇正黜邪指迷覺寤闡明二氣之精微發揮
五行之蘊奧字字金針言言玉律火傳薪燼其在斯
乎斯以布之天下後世助流王化無疆之休殷造奕
禩方來之福老人蠹莫知其所至矣憶自渡河汎濟
鼓枻論詩而後乃今垂三四十一年一再見之他日南
山之南北山之北良覲有時聘貽俟之于時從者三
人私竊識之因述其緒綸以名其書並設之版焉老
人何西嶽來有覺也過客何地學薪傳主人也時乾

隆三十六年版成條其始末如此卽以序於簡端

古文質義

汪思迥著

夢松軒集

汪宗海著

律陶詩集

黃甲先著

長留集

黃甲先著

韻餘草

檀明易著

沙園集

馮遷夏著

青湖集

章時習著

猶賢集

馮荃著

梅花詩一卷

黃安復著蓋借梅花以抒臆者自序云凡詠物者必
工厥詞律乃聲體有制詩豈易言哉而度物寫懷則

又不必規規乎拘一格以相繩也余之梅花詩非真有梅也亦非真無梅也余不知詩安知若何乃詩若何乃梅花詩讀古人之詩知古人之詩迺詩也讀古人之梅花詩知古人之梅花詩迺梅花詩也唐以前不多製宋明諸名公所著綦衆矣吾敢以梅花云詩然而知我者正不必爲之較工拙審音律辨體裁惟啞然笑曰某也有懷亦曰某花詩也可雍正壬子歲

仲春月

唐詩七律朗

馮金榜著

韻草

馮金榜著

河防存說

汪思廻著

詩學卿雲集

汪思廻著

有吾堂詩集

汪思廻著

有吾堂文集

汪思廻著

唐詩分韻

李騰芳著

東流縣志卷十六上

東流縣志

卷十六上

藝文志上

七

東流縣志卷十六下

安徽池州府東流縣知縣吳箴修

藝文志下

凡文詞紀述實事者以類條附於各卷之內其無可附麗者則著之於此理之謬悠詞之蕪穢無敢濫廁焉慎之也

明莊和科第題名記

東流縣學科第題名闕臨海陳先生以御史督學事至則狀所闕而僉舉之輯諸名氏匠者石工者役書者札而進士某某科官貢士某某科官罔或闕已乃額曰東

流縣學科第題名碑示勸也夫學稼之教皮弁祭菜以
勸其敬賓雅肄三以勸其始敬業樂羣以勸其成鄉飲
酒禮以勸其長幼適饌省醴以勸其養老功利弗以勸
爵祿弗以勸悖施而拂求也弗以勸科第爵祿之始也
而勸之弗已逆耶曰書某某於石者有忠矣有孝矣有
廉矣勸端在是也而曰爵祿已乎尹以佯來告記廼序
茲以示厥勸

徐大夏菊江客語

陽居子與客登菊江之新城盤桓而眺曰美哉斯城乎
俯閭閻而瞰曰異哉大役之後而民無勞色也乃揖父

老而詢之曰茲城也弗費民而弗役民也曰何曰陳父
母請於上積於贖戶絕而山田在者畝量之直募工甃
石不涉民而足朞月城成歸餘尙千計也陽居子復歎
曰美哉斯城其使君之心乎客曰誠哉其心也吾不知
其他也陽居子曰何客曰夫抱至皎者不眦乎豐利騫
大道者不睨乎巧術滲實澤者不招乎榮名爲可繼者
不希乎奇創成偉利者不惜乎巨費貽永遠者不愛乎
一勞要使天下見吾心而不駭吾事被乎實而不宰乎
名將天下可道也如是而止爾菊江南甸上流也縣治
臨潁島穴出沒城則天子之形勢益而小民之藩垣固

費民且役奚恤巨奚愛勞也廼委曲計處必使一毫不涉於民吾獨愛陳君歸爾餘弗有而曷心皎皎乎其可見耳他無或過乎陽居子曰嘻子固矣昔醫有危其妻之脈者妻曰妾本和平而君之中氣促耳吾觀陳君之政非巧而名實而道也無不可繼也而子乃齟諸拘攣之見是則咎醫而已矣客曰胡天下皆我而不陳君也陽居子曰荆陽之民適京師浮江而淮而河人所共也苟邑州之境北可以不江而淮道途易而朝貢達必將責之浮江乎夫所謂人道者非必常行於人者也苟經制而當可雖人所不常行而曷害乎道必曰常行然後

可則天下一繩墨吏足矣安用經濟乎故請天子之財而城之是猶索諸父母而衛其子也古之矜疑皆有贖亦以充國用也矧茲大役乎戶絕則產宜官之售微直以代官帑且不使吾民爲竊產之民也安在其爲不可誠可矣募工而趨之其事習其就固又不愈於起久安不習之民而必役乎如事而成偉利貽永逸所謂神而明變而通質之於民而民宜輸之於上而上獲反之於心而淵懿之實究措之於事而汪濊之澤流創偉觀於不世垂鴻名而蔽天壤也若曰是巧也廣廈其雕蟲之技乎而曰近民也則避明哲之號者將謂愚蒙乎此又

與於沒世不稱之甚也是則妨乎大道而子不自覺也
客曰然則天下可繼乎曰盡乎心無泥乎迹相乎時不
詭乎道天下猶一邑耳方今聖天子西北軫肝憂於戎
餉東南瘝深惻於輸氓高窮調變之淵神纖入撫裨於
閭隱欲得股肱之士而倚重之甚亟亟也若使君者耀
之而不次付之以不谷子未信乎今盍跂踵以待他日
乎客曰不類而過使君詎意通我若此也陽居子復哂
之客曰何爲其然也曰人心無殊降也利欲入不入而
昏憤通靈所從也舜禹之君尹旦之臣無利於天下而
天下遂易有使君之心而顧難一邑一城哉今子曰吾

明其心而暗其政是猶壁白而寶之曾不識其潤德而
溫華清廟明堂而麗也是誠寶之乎則子奚從而易通
若此子之易通子之易固也客乃撫心而歌曰磷磷雉
堞兮菊巒若峻淵淵嬰谷兮菊江若澄陽居子倚而和
之曰洵洵素函兮滄涯華峻蒸蒸爛築兮幽皓黃澄以上
他邑人

張溥鐘銘有序

天順七年學制歲久漸卽朽壤縣提調正佐官以其事
白於郡太守委照磨來治之越三月而櫺星戟門雨齋
饌堂厨庫號舍廝宇悉皆重建黝堊石砌煥然一新並

鑄講堂新鐘系之以銘銘曰有覺維鏞懸於學宮含霜
應律聲徹空濛角食節樂稽候則同夜以警寐晝以計
功振揚文教肅作士風億萬斯年於論在東

陸芹禱雨文

社稷之神五方之土生長五穀以養萬民有立命之恩
者也風雲雷雨山川之神上下神祇共贊元化澤潤萬
物者也城隍之神爲一方土宇之主表裏陰陽以行人
道者也是皆受命上帝載在祀典春秋祈報爲境內之
民禦災捍患豈空名哉嘉靖甲辰夏六月芹始蒞茲土
適值大旱先以告諸神矣神爲我禱之弗虔也而莫之

顧乙巳六月復大旱已待罪一年矣愆尤愈多神其肯
顧我乎雖然慢上虐下欺天罔人官實有罪民則何辜
勿以罪有司者而罪吾百姓也嗚呼民之窮至此極矣
稻死於旱甲辰無秋麥死於水乙巳無夏茲復旱熯流
火滿空焦禾殺稼昔也爲生求產今也棄產求生昔也
愛子千金今也百錢易子昔也魚肉爲菜今也蔬菜爲
米日一食不可得也況再三乎求糠粃不可得也況精
鑿乎上望於官倉庫匱矣下望於鄉儲積罄矣四望於
山野蕨薇盡矣老弱轉乎溝壑而孰爲之藏壯者散而
之四方而孰爲之返民亦何辜而至斯極也當此之時

民猶輸將賦稅供給神祇不敢逃避是雖朝廷之恩聯義維而效順如昔其情不大可矜哉諸神共有茲土能不惻然尚祈各展神功協成元化山川出雲風雷速雨郊野滿盈江河增長則夏穀用成公私各足神亦永有血食

陸芹告龍王文

夫龍神物也非知雨能爲雨者也脫骨於石棲神於淵登降於天墟氣成雲流汗成雨能造無中之有能救死中之生百神不能奪其巧天地不能專其功茲龍之所以爲神也若徒曰某日晴某日雨假巫祝以自見知之

而不能爲之則亦物焉而已矣奚貴於神物也哉方今
炎火飛赤千里皆赭禾稼焦殺萬物槁死某也啣天子
之命尹茲東土再值旱災束手無策旣求諸祀典神祇
未獲嘉報於神復何求焉頌白戴香粢元稽顙有司以
庶人服而暴怒尤於道左爲此者而豈徒哉所望者重
也使神莫不顧亢陽愈熾嘉生不成民不得其所以爲
民有司亦難乎其爲有司矣嗚呼民之命懸於食百穀
之命懸於神有司之命懸於民故神物者能生百穀養
萬民陟降有司之官其所操亦重矣哉苟念民之所恃
以爲命有司之所恃以爲官靈光赫然隨感而應駕風

鞭霆張雲沛雨而滂而沱旣霑旣足胞胎者秀吐華者
實珠璣遍於田野倉箱實於閭閻則百神之粢盛於是
乎出萬民之食於是乎賴國家之輸將於是乎供雖不
計其德我與否也因功而歸德觀化以崇神頌神功者
不衰則神亦與有光焉不然豈惟有司之憂抑亦神民
其羞

陳春重修東流縣志序

古者列國皆有史官所以紀時事著勸戒故史失其官
則君子有貶詞魯之史筆削於仲尼經生學士至今宗
尙誦之不衰蓋國家重典也今之祁縣卽古之列國史

官雖廢而志書之纂亦國史之遺意昔杞宋二國文獻
不足仲尼傷之則其君臣之賢否可知宋朱元晦知南
康軍下車之日首詢郡志識者謂其知所先務然則今
之守令豈可視爲迂緩任其殘闕而不知省歟余任東
流之三年政事粗舉民知向方每以縣志未修有歉於
表蓋自 章皇帝采編大明一統志及宏治間吾曾祖
大京兆溫庵公守池郡纂修郡志而東流縣志始有纂
本 毅皇帝南幸旣平宸濠之亂命官採俗及奉檄修
志而纂本之遺公府無藏者徧求民間乃得之始克草
率訂輯成書亦仡仡然其間矣嗣是及今六十年來豈

無事畧可述使復漫不加意則世遠人亡教殘政息而
莫知所紀卽有後之君子考衷於文獻將何取徵焉抑
如頃時朝廷使者復出訪求風俗不知何以爲獻夫道
渴者不免於潢飲疾行者不能爲善步平居玩愒自弛
而臨事欲其遽集吾知難乎其盡善矣况一邑之志所
以昭實錄垂大訓而可勿預爲之圖乎余用是自懼乃
聘邑之賢者維摩州守汪公文以綜其任公年耄而德
充神完而才瞻知是邦之事者必是邦之賢而况其齒
莫尊焉則老成典刑於是乎在佐其事者亦皆一時文
學士志成體辨而意裁事核而文雅信可垂之永久後

有績修是志者當不煩潤色而成功亦易也惟建城二
狀寵竊華袞似溢涯分余請削者再而汪公以將傳信
不奪遂偕而序之於首簡云萬歷二年甲戌秋九月以
官斯
土者

宋邦輔東流縣志序

東流舊有志久而放失不復爲完書幾十年矣正德戊
寅秋四明李侯以名進士來知縣事承弊政之餘滌癥
剪穢休孺植僵舉無遺術閱歲周諮廢墜知縣志缺狀
決意修之而適遭師旅之興地當江西下衝水陸雜遝
供頓輓纜居無寧日侯欲修之意雖未嘗怠而修之之

期則固有待也歲再閱當今庚辰之秋撫我南畿大都
憲李公奉朝命移所轄郡縣各以圖志進而侯之意遂
有若植於先而發於後者故其修是志也益力而將命
唯謹茲率厥僚幕沈連謀於僉得邑庠謝司諭明日博
而文精而核者遂專委之而侯總其成其建置沿革山
川靈跡風俗物產惟舊或未備者稍稍增入若戶賦之
登耗都圖之並析人材之消長與凡名宦優政碑記題
咏一切隨時損益之類則又不能不極其詳審焉僕時
以講學於外不獲與聞汰撫之意而其歸也適當書成
之期方將板刻以呈於朝而以其副兼示永久顧亦溢

及謏薄而以末簡相命僕惟邑無聞人而荒落最又
不足以走辱大方家如其長於斯享沐桑梓菁莪之休
者而亦不肯言豈徒爲敝邑羞而僕亦與有罪者用是
再辭不獲敢僭伸一咏粵自九丘禹貢之作而圖志之
說已開端矣然莫備於成周之盛旣營於地官又藏於
司馬又識於宗伯若周禮大司徒職方氏外史之所掌
是也秦漢以來覩縷不可殫述肆我朝損益三代而於
圖志尤致意焉方洪武改元之三年卽命儒士魏俊民
等類編天下郡縣地理形勢降附始末爲大明志厥後
復有一統志之修而郡縣亦各有圖經地志之藏綱舉

目張燦若天經運於上而日月星緯各貞其度地維建
於下而海嶽陵瀆各奠其居遠走於容足之微而細入
於食毛之土苟按圖披志以觀其取舍而節其歛散均
一其道里疾徐其徵發轉輸如指諸掌猗歟盛哉其視
成周則又過之真昭代不刊之典而天下臣民所當觀
而震焉者也若東流舊隸彭澤南唐時始置今縣名爲
揚州之下下不能當南斗百分度之一而亦以圖志錯
其間曾足爲有無耶况無高山廣谷以神其靈無名公
巨卿以增其寵無遷客幽人長材獨行之士以寓其怪
而見其卓犖其地狹而瘠其民寡而貧其風俗多齷而

編野而近淳其學校不甚茂而宏而科目不甚屬而顯
故其好尚務疾耕力食而以絃誦爲悅嗚呼慨哉惟茲
東流雖無而志雖缺可也然方今朝命之所採錄者未
嘗偏有所遺而侯之治是邑與今修是志也顧亦若兢
兢然恒以不稱事爲懼者何耶竊譬之天下猶身焉京
師腹心也畿甸元首也名都大藩爲四肢而諸郡縣爲
耳目鼻口掌附指爪其蒸民品彙則髮鬚眉鬚毛毫之
類也今人之身摘一髮拔一毛尙足爲痒痛况剔一
耳目剪一指爪固非不語笑動作精神丰采之不失爲
人然謂之爲全人則未也夫知剔一耳目剪一指爪之

不得爲全人則知天下之大廣輪之完以固苟遺一支
郡漏一下邑亦烏得爲全勢然則東流誠不可無而志
誠不可缺固宜採命之所不遺而侯之自爲兢兢益懼
者歟且地氣盛衰常相倚伏而人事變化患無以發其
機誠願當道者爲守令者不以他邑概視而盡試其和
扁之術鍼膏盲起廢疾深爲之功而徐觀其成則瘠而
狹者將糞以饒寡而貧者將繁以殷福者將有容野者
將有禮隴畝耰鋤之子皆將趨蹌俎豆謳歌詩書爲儒
業又將有厯壘環梧之士自學校出而蜚聲甲科正色
朝端爲是邑之光者雖其山川之不可強而增而賢哲

之不可援而附然一大江足爲形勝甲一靖節祠足爲古今絕氣機一回衆奇並出而其可慨焉者又安知不爲一大快哉審若是則敝邑之盛將與是志俱新若我國家一視之仁固當與天無極而侯之轉移振奮其德亦可永長思矣僕固疎且駑敢不鞭策以竢是爲序正德十五年十二月

汪文城碑記

東流城成撫軍以邑侯請函書往元纁徵前大中丞建德徐公紳記其事穹碑巋然金石炳烈揭樹於西門外之周行我侯之碩畫敏功駿業洪澤旣以昭著而監守

諸大夫之主維協力謀謨弼諧亦克揚聲光於霄壤矣其紀是城之役則始終具陳纖鉅畢綜誦之纚纚然若燭然而籌計使有文士復起操觚而隨其後猶附聲逐影惟視他人爲趨態何以施其工巧哉而余顧猶爲之者有說焉則茲邑士民之所願爲舉也凡人之情惠斯感感斯悅悅斯頌頌則不容不託諸史而飾之以文乃衰朽山谷不能文莫余若也而邑之士民許玉輩不余鄙率其儔踵門而譁曰我德侯頌侯將勒侯之績於石黃髮老叟曷不爲我倡而文之以辭余遜方未獲而貞珉之璞已瑱之邑門矣余之不能已於言也因揖父老

而前曰善乎諸士民意將以功德侯於不朽也然余有
驗焉定其論而後修其辭彼侯之未下車也其在閭里
之間得無有兼并爲橫者乎今何如矣衆應曰豪強屏
跡矣茲何患其在公府之厠得無有侵蠹爲姦者乎今
何如矣衆應曰案牘肅清矣茲何慮凡傭調之征供餽
之應得無有誅求嚴刻重困於下者乎今何如矣衆應
曰祛冗省繁矣茲何害頻年之田畝得無有荒歉不登
儲積罄然者乎今何如矣衆應曰雨暘時若比歲大豐
則自侯之入境始我飲食侯德茲何可忘然則侯之奉
明詔發德音初議建是城也諸士民始而信旣而疑終

而翕然信乃堅茲復渠渠期期請必文之碑勒爲侯功
德頌而不肯自己者何也衆曰唯唯我侯之赤子耳侯
衣我食我鞠我覆我我有所欲侯皆心誠求之而中於
我是以建城之議下而始莫不信也侯之心固欲城以
庇我無他也我無知也慮或輟我乳餌而姑襁褓我是
以或有疑旣侯決議請爰金以興事而民間毫髮無所
藉則我乳餌之不輟而果襁褓我終不置也是以終而
信侯之心爲益堅逮夫城役旣作則財皆輸之於傭也
工皆集之於募也我士民之絃而誦者猶改也耕而鑿
者猶故也市肆而貿易者猶故也樵汲之道未嘗易廬

舍之徑未嘗毀邑井安堵而百姓晏然猶故也曾未朞
月深隍峻堞條然已成晉我之塗炭而危者已衽席帖
然安寢息矣鳴柝而警者已重關寂局夜漏矣呼盡而
恐者已歌舞恬然忘樂利矣然則侯之庇我也雖子孫
遠裔猶將蒙其功德況近爲黎庶者乎雖百世之下猶
將頌之不衰況一時身被其澤者乎故求文諸詞者所
以文吾心求勒諸石者所以勒吾心也翁其謂我何哉
於是黃髮老叟攫然抃手而作曰千雉凌雲城之高繁
何窮矣而侯之功其高殆與城等乎百堵平江城之厚
繁何極矣而侯之德其厚殆與城並乎三里爲函金湯

繞固城之廣繫何限矣而侯之澤其廣殆與城埒乎請以是爲士民頌抑可謂文諸其詞矣乎衆父老曰唯唯否否頌未盡也莫高匪天而功之建於侯巍然乎其天也莫厚匪地而德之樹於侯窿然乎其地也莫寬匪海其繞寰之外也而澤之溢於侯汎然乎其海也而何惟臧之是喻哉請以是勒諸石庶乎其勒之深也叟曰不然至堅者若如金石而人心之不可磨尤勝焉至藻者莫如文詞而人心之不容飾有加焉適父老曰勒吾心斯其勒之至深也已余雖不文請文諸士民之心而銘諸石若乃我侯建城猷蹟則有徐大夫之文在侯名春

字生之浙仁和人也銘曰崇城魏哉雄弁江甸鱗齒函
居烝黎永奠經始惟侯宏猷曠見匪仁弗徇匪智弗辨
匪字弗畏匪決弗斷矢心格神靡逼靡僭上下相維天
人協贊纖力匪微纖計匪欽巨役旣興百執胥勸市罔
遷肆田罔遷畔築避我廬地罔我塹陶邱伐巖工賈踴
扑匪暮迄成鄰封競羨矧我蚩蚩寢食游衍出入城居
室家我燕靡費靡勞熙然并繫逸享厥功惠焉有汗煦
煦我侯曰來爾念我植樊籬耕桑爾佃我樹屏垣姦侮
爾扞邈彼鄉居匪忘爾矜設遭匪虞收保趨縣雖離我
侯政業有炫衛我匪城愷悌靡殫功德崇厚穹壤罔擅

歲澤汪洋隘彼溟渤我銘侯私詞靡卒瞻伐石泰山歎
然有憾心勒靡昭昭以俚諺億萬千年子孫永鑒以上邑人
國朝梁應元重修東流縣志序

東流故古彭澤地晉陶靖節作令種菊其地邑署菊江
由此其昉也菊江瀕江爲治風帆千里激湍怒流吞吐
萬狀澎湃逶迤沃瀦山足而東下之陸當豫蜀五嶺之
衝輪蹄旁午人地儉瘠亡商賈之羨以故民樸尚耕然
五柳流韻清風淑人邑多禮義所謂理要會酌時宜覈
事顯義用彰勸懲有足述焉蘇君綽布撫摩中心物愷
無土不殖賈循舊業農習先疇蓋已百廢具舉矣顧尤

慮邑之有志文獻之徵也缺焉罔輯則山川人物之盛
無所指述禮樂兵農錢穀賦役訟獄之事無所昭布元
荒災札妖祥之變無所考鏡惡在謹職守而導風猷爰
是修廢起墜慨然有思於命世作者之意俾田土由墾
而墾戶口由散而聚賦役由隳而興錢穀由約而豐民
性由漓而淳吏治由玩而飭人才由衰而盛文教由廢
而振一切修人事而致天和諸務靡不討論精核橫分
事理準諸左氏之例而取於史記之一體異日者輶軒
採輯燦然明備其於

聖明文治之典詎不昭大同之盛歟夫經以載道史以

載事假令事機頗謬叢雜曼羨無所指歸其道終莫達也易列象器書陳政治詩採風謠禮述儀物春秋紀列國時事皆未有舍事而侈輕者也事明則理得理得而天下可治矧一邑乎不佞忝分符守簿書之暇嘗一披覽郡志用知地方形勝風俗純龐茲邑以殘缺之餘修明百廢實助我所不逮其於同風一道端有賴哉順治壬辰年夏四月

孔貞會重修東流縣志序

晉先王分州畫野爲百里之國萬區繡錯碁羅合而分分復合載在前志可考也吾建之初以一鎮隸於潯陽

稽禹貢彭蠡既豬之文與東邑僅迤邐於襟帶間耳又
割建以隸饒疑於分矣逮唐永泰時饒有方清陳荊之
亂窟穴於宣饒而其支黨乃盤結江上於是茂卿李公
議割隸饒之建補諸邑以肇造吾池池之得爲州自李
公始而建東之合屬亦繇之李公者卽與今操撫李公
祖之姓同諱同奇矣昔肇造之功今綏定之功歷千載
餘而如出一人夫豈偶然哉繇是吾建之與東如手與
臂指之相爲舟夕發而晨至車辰發而午至田疇錯焉
貨賄聚焉訟獄歸焉建人之望東之有賢令也與其望
建之父母無以殊而東父母亦時時進諸郝而加之幾

不辯爲非一父之子也今關左蘇侯乘彫敝之餘加意
休息湛恩汪濊餘以溢我會竊隣績之光而蒙河潤之
福匪朝夕矣所徵嘆者建東之相合如一家獨柴桑一
派高風播千古東人得私之爲已有而建不得而共之
此疆理所由殊而邑志之所爲作也邑友陳何二子秉
蘇侯命奉操撫公修輯之檄惟謹罔羅搜訪其博也如
食蹠之盈千而其覈也無辨尾之詭四才學識斯殆兼
之帙成乃以余不佞紹有家學先兩兄曾官太史掌天
下邦國之志謬謂會必析於古今疆渥大分合之故也
來問序因僭爲紀之順治壬辰夏四月

趙青藜東流縣志序

乾隆丁丑之春迎

鑒於金陵晤蔣子若齋告以纂輯東流縣志事有是哉
吾未覩子之政也吾以知子之得政本矣夫志所以定
民志興民行彰往訓來助宣教化而吏治之因革亦得
以自鏡焉平居讀書稽古遇大忠大孝未嘗不測測心
動卽一官一職一事之得亦必自省而勃焉以起思以
繼蹟前休况志之於地較切於事較親於人民皆吾赤
子而父母吾者展卷之下寧惟是備一邑之掌故恣山
川之美觀已乎吾因之有感矣志之於人如風之被物

莫可指名一二俗吏呂其事不列簿書錢穀刑名之課
無關殿最急功名置不問安因循廢不舉有若茲邑之
志自順治壬辰曠曠焉百餘年以至於茲補缺遺而垂
無窮於後有司之責也吾子其勉之秋九月余適有佳
廬之遊道經菊江泊舟郭外入焉道塗修治市巷恬熙
奔走供役者

文廟之式廓待成於不日也灑掃肅清

萬壽宮朔望講灋讀令之所巍然在望也以定民志以
興民行政之大本具矣宜吾子之拳拳於志哉適汪君
京門應聘至自江寧掌修志局與予握手言歡余時賦

八景歌天然增登江亭拜陶靖節李太白兩先生祠留
詩而別若齋曰志成願賜一言頃者郵寄志稿綱舉目
張簡而該詳而有體凡夫疆域之建置戶口之登耗風
俗之澆淳政治之得失人才之盛衰無不較若列眉而
歸於是徵考前王辰時甫離於兵燹邑令蘇君能於凋
敝之餘力爲振作蔚然奏績今
國家厚澤深仁教養已久

天子聖神眎民如子求賢若渴

巡幸所至問疾苦按俊髦蠲租賦增博士弟子員駢陶
涵育無以復加東流固依然疆域也舊志云地狹民淳

男事耕漁婦勤機杼士耻浮夸而敦踐履無鬪雞走狗之習有尊德尚齒之風今其已然者不殊於昔而方來者正未有艾因其淳以利導之倍易爲力從容措注俾農安於野賈安於市陋貧者可饒而教化可興教化興而絃誦盛人才輩出矣豈不更有可志哉夫型仁講讓說禮敦詩處式鄉閭出效馳驅固邑人士責而接之以慈祥隆之以體貌鼓之舞之以使之知所勸懲吾子責誰與踈抑還念吾子之展卷而卽其親且切者求之也乾隆二十二年歲在丁丑冬月之吉

寶寧東流縣志序

自尚書列禹貢之篇周官載職方之紀嗣是而歷代史臣方輿有考輿國有志此志書之作所由來矣蓋古者列國皆有史以昭同文之治以備省方之采今天下一家分爲列郡又分爲各邑則郡邑之必有一志如列國之必有一史也蓋所以表山川正封域稽田賦核經費重農桑以足衣食興學校以叙彝倫修祀典以肅明禋飭倉廩以儲積貯觀往可以知來剔弊可以興利俾守令之官於下車伊始一覽具悉而可以加之因革焉志之所係顧不重哉池郡所轄六邑濱於大江者銅陵貴池及東流也而東流實居上游風帆賈舶逕來吳楚者

道所必經雖彈丸末邑實南之襟喉江漢之門戶也且其山水清淑原疇沃衍歷代名流棲遲高尚者班班可記如陶靖節五柳之居松菊之徑遺蹟尚存凡四方賓旅之過者莫不望荆江而溯洄有美焉蓋此邑原自彭澤而分所謂潯陽九派之源至是而合彭蠡東匯之澤及此而平東流之名所由昉歟漢江蔣君來令茲土亦越三載政理於平羣心既協百廢具興因檢閱舊志見有未備首集邑之名宿旁搜而增續之既成稿而請序於余余觀其發凡起創綱舉目張圖繪之分明紀載之詳密河渠溝洫井井有條宦績人文彬彬可攷蓋所以

表前哲之休聲而貽後人之渠範其係於

國計民生官方吏治非淺鮮也夫池陽介皖歙之間勝蹟名流擅於江左東流雖屬邑之末而民生樸質士習敦龐猶有南村卜隣素心晨夕之遺意茲更得賢令而撫循之其規畫措施率由前志則茲志之輯也豈惟一邑賴之亦庶幾俾按郡而爲太守者得以承

簡命而布旬宣偕庶尹以分猷念於以合之郡志省志一統志又可以備他年正史之採擇者皆於是乎在矣乾隆二十有三年歲次戊寅仲秋之吉

以上他邑人

楊尚策重修東流縣志序

順治八年歲在重光厥月惟丙曰修重光者猶書言重華也修則有修舉之義四方從龍者於此觀文治焉邑侯蘇君乃詣頴宮諭策暨訓導劉君坤元曰國家混一海宇定亂以武綿治以文方今盛事寧第在師武臣力哉上焉者備明禮樂宰制羣倫下焉者修輯圖書豫備採獻皆是物也東流邑志某不敏謹從兩先生修之兩人固辭不得乃私謂曰蘇侯以撫殘黎興廢蹟爲志凡公署學校悉殫厥心力以漸而成茲事固宜付之吾儕何容辭爰會集諸弟子員復訪延山澤中士二人以共爲政侯間曰一至而校讐否當焉越旬曰爲八月

集竣欲卽梓以傳緣俸薄用煩弗如願明年壬辰乃命
諸刻工成之侯噓然自喜謂兩人不可無序策元聞序
者所以叙其事之始末也而志之始末侯自叙中已見
之若茲之叙則亦叙侯之事以佐志之所弗逮已矣東
邑自寇躡以來官舍燼矣氓廛墟矣桑麻廢矣絃誦荒
矣以如綫之地縹緲江濱而戎馬上下水陸交經幾何
不爲孱倣乎侯至而惻然悲之一切招撫俱以至誠相
感故追呼弗擾贖罰悉除農得墾田而安於野行戶照
時胥吏歛跡商得僦居而安於市砥礪頽風扶進正行
士得諭教而安於序以至大師過臨躬爲調御而境內

安堵三載之間官舍坻厓煥然改觀桑麻絃誦蔚爾生
色而今乃得捐已資延師儒優游從事於文墨凡此孰
非侯事之所當志者顧侯不欲以自志諸士又不敢以
共志而策若元兩人不知志之則將何以爲後人之徵
信也歟敢拜手以爲是書跋順治壬辰夏四月

徐文炯菊江亭告示

照得江山勝概爲騁懷遊目之區賢哲遺踪興托雅揚
風之思是以醉翁豐樂名太守寶從留連赤壁錢塘賢
學士詩歌慨慕洵足輝今而映古要皆因地以傳人也
東流下邑介在江濱南國衝途經茲水驛停雲達士間

嘗五斗以折腰嗜酒仙人徧歷九華以窮日盡公田而
種秫籬有黃花邀明月以停杯歌留清影酒樓百尺雲
間海上共千秋菊圃數弓草蔓烟荒存一片莫爲之後
恐有美而弗彰急與維新乃曩賢之如昨蕭疏鶴徑宛
轉清蒼窈窕鴛梁徘徊空闊參差於雁子見雛之側被
以房櫳歷亂於君遷平仲之間嵌之臺榭遙攀九疊羨
佳績之成仙極眺雙孤笑彭郎之未嫁攬縠紋之搖碧
欸乃漁郎邑眉黛於垂青爭鉸樵斧吳商楚客春秋乘
興以登墨士騷人早晚尋幽而過然必共爲珍惜庶無
凋殘零落之虞力與維持克永亭閣清幽之況本縣承

乏邑令景仰風流因丁寧夫住持僧人更戒飭夫境中地保留心照着灑掃宜勤加意防閑穢汚用飭本縣自公退食相與樂民物之恬熙爾多方職思其言尚共惕宴樂之耽毒云爾

蔣鳳色菊江亭題辭

靖節先生之愛菊也愛蓮說稱之曰獨且曰陶後鮮有開仰之也而或以水陸異趣蓮之不染不淤未可爲菊頌古之人其亦各領其妙矣乎及登是亭觀其額曰菊江問其址曰種菊之區噫菊耶胡爲而江耶豈當日鋤雲耨月者亦有出淤泥濯清漣之意乎已而憑欄遠眺

野色葱葱客曰此蓮花洲也余不禁浩然歎矣夫菊之
氣維清蓮之體維潔昔人且各領其妙不能並一日居
之今何幸而得兼覽其勝耶於是臨風把酒對客頻斟
俯仰憑弔如有所得其視世人之愛若不啻浮雲矣爰
不顧狂妄書曰菊連相映之樓

左亮重修東流縣志序

事有越百年而人士共樂其修明者東之邑志是也東
爲彭澤舊壤晉靖節淵明先生遺風餘韻在焉我

國家聲教誕敷易直子諒之吏相繼來官於此助流宣
化百有餘年生其地者沐浴涵濡旣深且久固有以知

其日進而日上也乾隆丁丑夏

邦侯蔣返自金陵詰辰詣學語亮暨訓導蔣君培穀曰
聖天子巡幸江南省方問俗所在陳詩納賈采輶軒以
觀好惡靡不各有志焉以紀其事東故南國上游疆索
也邑志自順治壬辰以後未經修輯茲將與邑人士彙
訂之其共勉厥事於是亮暨培穀聞而喜敬前席而請
曰邑之有志古列國各自爲史之遺也一邑之政治典
物或隨地變通或歷久彌新志焉而天人禮樂閭之可
知賦役山川索之可詣往哲之懿行幽閭之勁節與夫
一切建置沿革之故悉得詳述已往垂示方來以厲綱

維以樹風紀於是乎在侯殷殷肇修乎此此一邑共稟
之章程奕世不朽之德政也敢不惟命踰月周諮於邑
人士爭踴躍樂從歌舞其事不休侯於是延乃邑中文
行之士若而人筮日於八月初旬開館纂輯未幾侯以
賢勞茂著奉檄治水宿淮因屬亮與培穀共董其事閱
數月稿具今年夏五月侯旋署取所具稿條其綱目理
其部分細加潤色彬彬郁郁而書成矣時侯復諭亮與
培穀曰志事殊闕學校曷叙一言私竊自惟叙者叙其
始末也侯自叙備矣郡伯之叙更彰矣無容贅顧以

聖朝之道化浹髓淪肌百年於茲賢司牧率厥政教樹

之風聲良法美意未易更僕數繁惟我侯之蒞東也首
崇

萬壽宮而衆著於尊尊之義矣次式廓泮宮門牆而衆
著於親師之義矣次鼎新武廟修理城隍又次書院課
士郵亭利人一切成民事神之務百度具舉以視昔人
種菊翛然固有各行其是者余兩人願與東人士共志
之不忘也敢以是叙之於簡其可乎乾隆二十三年歲
次戊寅夏六月

袁楫移建學官勸捐告

古者家有塾黨有庠術有序國有學學也者教化所由

起風俗所由成人才所由出爲政之道基諸此者也我
朝文教昭宣百七十餘年於茲重熙累洽炳焉於三代
同風四海之內學校如林東流學宮自雍正元年重建
迄今九十餘年雨剝風摧日就傾圯嘉慶十八年邑人
士請詳各憲遷建大成殿於明倫堂之東明倫堂遷於
文廟之西而更新之以費竭而工寢十九年輯秉鐸茲
邑瞻拜禮畢與訓導史君應暉計之曰學宮重地也費
極而工寢非尊崇之道是君與予責也請之邑令吳侯
吳侯欣然捐奉爲倡第興作之費所需甚鉅與邑之都
人士共計之都人士尚敦古處踴躍急公願其各捐貲

以成是舉昔有未備期其備昔所已備期其成庶幾陶
徵君所治流風餘韻猶有存者且都人士固邁越流俗
敦崇根柢漸摩於禮樂詩書以淬厲其文學者他日學
成而仕大展經綸效建白於當時上副

國家作人之盛而學宮明教之地任其摧頽其將何以
勸俗乎余不敏願以爲告樂輸者書於左方嘉慶二十
年九月 以上官斯土者

汪思廻東流縣志序

邑侯蔣若齋先生治菊三年政通人和百度具舉邑人
士沐其教令薰其善長所在歌有臺咏樂只矣於時乾

隆二十二年丁丑

皇帝巡省江南行慶施惠 侯奉檄治道鍾山肅將覲

禮 思廻 以詩賦恭迎

聖駕循例謁 侯於招提 侯具諮以修志狀 思廻於

是欣然避席而前曰甚矣 侯之嘉惠於東也至無已

矣志古外史職方之遺也孔子因魯史舊文作春秋朱

子知南康軍首詢郡志邑之有志官斯土者之事亦生

斯地者之責也東自前明正德始創爲志萬歷中家維

摩州牧文纂修成集久矣我

國朝順治九年蘇侯網羅散佚草創一書百餘年來生

聚休養美備宜增修之顧勿急急哉夫東

朝廷之赤子也食其福而不知其故飲其和而莫揚其
休無寧茲載高履厚無以自明而心神幾蹙矣乎夫簡
之官司厚以培養敷之教化同以道風東之無殊於通
都大邑固也官師之典型井里之疆索民物之登耗賦
役之輸將學校城池宮廟樓觀與夫名山佳水古蹟遺
行之紀載東之無殊於通都大邑又固其所也志焉以
宣

聖朝之德化樹下里之風聲昭來茲以垂不朽非修明
而章著之其道無繇抑又問之太上立德其次立言

侯東之父母也一邑之中政行之因革法制之教戒民行之善惡風俗之易移舉而志之條分縷析俾各曉然於遷善遠罪之途相與安分循理悖信義而重犯法優悠於光天化日之下不亦德乎 侯精勤素裕簿領從容刑名錢穀而外農田水利諸務克咸厥勲茲用條其濡度照其節目流示以隨時損益之規詳爲編紀勒之章程以垂永久不亦功乎 侯仕學兩優淵通雅瞻出其緒餘潤色山川歌吟典物筆削之所及擬於左狐絃誦之所流銘於戶牖一時奉之百世傳之不亦言之行遠乎允若茲志德言功兼三不朽侯之嘉惠於東寧有

已哉 侯曰然余志之心也請以屬之越月 侯返筮
日於八月初旬肇舉纂修時則有若庠師總其政時則
有若捕史董其役時則有若孝廉選士分司編輯時則
有若貢監生員共襄校對時則有若繕寫圖繪若而人
度支採訪若而人布置既周館句咸定而猥以邇之不
文致之自江寧屬以掌修車在噫嘻修志大典也哉
國家深仁厚澤百年於茲長有司撫綏而勸勉者非一
人一時之爲之也前之典章湮沒未能盡識今之事蹟
挂漏未能周知編摩之責實端端焉深懇負託不敘重
有仄乎我 侯嘉惠東人之心爰用根據原志析得萬

歷中舊志一本參互攷訂析類分門博稽古今載籍旁
証郡國諸志闕者補之訛者正之畧者詳之失次者叙
之新入者續之凡數閱月早作夜思與諸同人平心矢
慎其相比究焉爲綱九目五十方之原志增三之二比
之萬歷舊志益二之一敬以俟 侯之裁定或不謬於
嘉惠東人之意也夫書成請命於 侯以叙其事乾隆
二十三年歲在戊寅秋七月 以上邑人

晉

陶潛勸農篇

悠悠上古厥初生人傲然自足抱樸含真智巧旣萌資

待靡因誰其瞻之實賴哲人哲人伊何時爲后稷瞻之
伊何實曰播殖舜旣躬耕禹亦稼穡遠若周典八政始
食熙熙令音猗猗原隰卉木繁榮和風清穆紛紛士女
趨時競逐桑婦宵徵農夫野宿氣節易過和澤難久黃
缺攜僂沮溺結耦相彼賢達猶勤隴畝矧伊衆庶曳耜
撫手民生在勤勤則不匱晏安自逸歲暮奚冀擔石不
儲饑寒交至傾爾倚刈能不懷愧孔耽道德樊須是鄰
重樂琴書田園不履若能超然投跡高軌收不歛穰敬
讚德美

陶潛九日閒居 有序

余閒居愛重九之名秋菊滿園而持醪靡由空服九華
寄懷於言

世短意常多斯人樂久生日月依辰至舉俗愛其名露
淒暄風息氣徹天象明往燕無遺影來雁有餘聲酒能
祛百慮菊爲制頽齡如何遂廬士空視時運傾塵爵耻
虛曠寒花徒自榮歛襟獨閒詔緬焉起深情棲遲固多
娛淹留豈無成

陶潛和郭主簿

和澤周三春清涼素秋節露凝無游氛天高風景徹陵
岑聳逸峯遙瞻皆奇絕芳花開林樾青松冠巖列懷此

貞秀姿卓爲霜下傑啣觴念幽人千載撫爾訣檢素不
獲展厭厭竟良月按九日閒居詩未必是在彭澤時作聊錄之以實菊邑掌故耳

宋

王質東流道中

山高樹多日出遲食時霧露且霏霏馬蹄已踏兩郵舍
人家漸開雙竹屏冬青匝地野蜂亂蕎麥滿園山雀飛
明朝大江載吾去萬里天風吹客衣

梅堯臣江口寄內

艇子逐溪流來至碧江頭隨山知幾曲一曲一層愁巢
簾有翠鳥雄雌自相求擘波投遠空丹喙梳輕脩嗚呼

乃不已共咏還相投
睠茲雙飛翼安得與子遊

黃廷堅丙申泊東流

前日發大雷真成料虎頭
今日伐鼓出棹歌傲陽侯
於江百折來及此始東流
東流今日賓建德椎羊牛
野語尙信然小布黃蘆洲
惟有採薪翁經營往來舟
楫櫂盡斤芥山重烟雨愁

楊萬里解舟雷江過東流

雲散烟還合天晴日半烘
青山猶沒白碧水欲輕紅
棹幸欣平浪公無怨逆風
回思五湖裏敢望大江東

元

吳澄五柳堂

此非元亮幽棲處而喜亦無車馬喧澍雨一時蘇鬱熱
流風千載挾清寒秋田舊治民猶昨柳岸新亭客避煩
江面波神應冷笑曾聞容膝可偷安

貢師泰送東流葉大尹

江流東下縣南遷一簇人烟野岸邊荻笋洲青鷗鳥狎
楊花浪白鱗魚鮮印來聚米排衙鼓社到隨民出俸錢
應是繡衣行部處攔街齊頌長官賢

明

程敏政菊江

陶家莊子未全荒籬下西風一徑霜紅紫相看零落盡
寒花只作舊時黃

陶安望東流

千嶂浮空翠入舟亂雲堆裏指東流無緣結得烟霞伴
架屋松風最上頭

舒芬東流遇雨

晏歲東流路江雲黯寂寥雨滋帆葉重風惡浪花飄
鴈飛偏遠蛟龍舞若驕客懷何處遣隔岸酒旗招

邱濬謁陶靖節祠

桓公事業舊山河觸目傷心可奈何籬下菊花門外柳

時時相對醉吟哦

寒達東流舟中醉時遣懷

薄宦天涯良已久挂帆又泊東流口江風颼颼雷霆吼
浪頭噴雪蛟龍走拔劍四顧空林藪經過誰復親舊友
呼童爲我開數肉巨足之鰲持在手須臾興發傾百斗
自昔王侯骨已朽富貴浮雲何足有人生難擬金石壽
朝爲少年暮老醜孤舟獨坐時搔首但須倒盡如澠酒
爲問遷客酒酣後昨日窮愁今在否

東流依水置遙望若層空人影蛟宮裏城闕蜃氣中山
開趨背勢帆挂往來風意與雲俱遠關情送落鴻

鄒元標東流阻風偕劉公霽萬士瞻登閣

江上停桡興未頽且因佳節躡崔嵬山藏孤邑千尋轉
石嶂狂瀾百丈迴城外荒臺餘返照空中高閣共銜杯
相逢莫漫悲搖落雲盡峯頭月正來

周良會送東流李縣尹

列星分彩照東流涼雨淒風次第收百里春回陰谷暖
一輪月浸碧潭秋鹽梅雪裏知王子枳棘叢中借鄧侯
夜向郵亭寄萍梗分明更鼓見嘉猷

莊泉觀菊

秋光莽莽到東籬要識陶家意外詩倘把傲霜從白看

此花天外沒人知

酒杯無語問江州
曾許淵明共睡劉
倘更白頭成晉史
老夫當拜數枝秋

楊季芳簡儒學教諭周鉉

可人風月浩無涯
華胄濂溪本一家
何日乘閒撐畫舸
蓮花洲上看蓮花

楊季芳題廳壁

茅茨數十野人家
湖水春深努荻芽
風暖日長公事簡
細聽黃鳥罵桃花

不攜家累過三年
無吏能來橫索錢
翠落月明山犬吠

時人間說縣官賢

李渾菊江

寂寞江城裏悠悠度歲華
琴書經眼倦風雨入簾斜
元亮誰供酒盧仝自煮茶
寸心應有在千里帝王家

李渾泛菊江

畫船乘月泛清虛
香露薰風襲綺裾
長嘯一聲巖谷震
寒潭驚失睡龍珠

李宗泗踏災歌

四年徑雨旱一騎遍三秋
畏熱炎如火思霖渴似油
溪乾生石齒潮落吐沙洲
斜日喧烏雀炎風病馬牛
黃童

闌道哭白髮倚門愁厨冷寒烟散機空夜月投半瓢成
鼎俎一粒當珍羞紫蕨沿山採青菱入水求摘蔬傷指
甲吞稗苦咽喉爲債連朝避拖糧逐歲勾忍饑扶耒耜
抱病臥林邱少壯流離苦衰殘枕籍休生疎傷骨肉遺
問斷交遊破屋雲虛鎖荒村葉自留清癯松上鶴飄泊
浪中鷗具牒申台省交章達冕旒致災先自我獲罪欲
何尤日月開天眼乾坤校帝猷治安思董賈燮理任何
歐號令雷霆發恩波雨露優不才思後補多病死前修
扶救惡星火奔馳速置郵塵埃侵兩髯露氣壓雙眸細
路枯藤合陰崖老樹稠魚鱗分井絡龜圻數田疇枯草

垂頭死平沙入望浮荒唐鳴蟋蟀破堰出蜉蝣拭淚思
長計虛心就善謀博求千百士首取二三籌問苦先孤
獨扶衰惡善柔軍儲求奏免公務望停留耀式防民患
通財聚客舟救荒虛庫藏散種給來牟桑落絲難稅湖
乾稞莫收六街除浪戲四野化鋤耨枯木迎春發傷鱗
縱壑遊室家原有托俯仰更無憂聖化同乾健皇明與
地悠九霄生瑞靄四海起歌謳坐委懷兢懼成功喜唱
酬一樽閒對菊秋色滿南樓
何一縉香溪早雪

昨日夢登白玉堂今朝瑞雪徧江鄉須知雪白堪同玉

誰信官清更勝霜

國朝

沙張白東流

我經東流縣縣民半羈旅聲音互嘈雜不復辨鄉語透
迤入城中瓦礫間荆楚尋問土著人未言淚如雨昔年
左大帥避賊屯此處破城屠縣民萬家付一炬屠後屢
兵荒兵來民益去烟火數年空空城無雀鼠官府募流
亡應募只商賈商賈無戶籍幸免催科苦近來四五載
頗慶稱樂土漸漸有茅茨富人免露處但求少鋒鏑孰
敢怨貧窶我聞父老言憂心慘如瘋回舟罷讀書臨食

箸不舉所見僅一隅歎息念六字何人任將相世道遂如許

朱士英江亭懷古

數椽亭子枕磯流檻外烟波任去留千古高風何處是黃花明月一江秋

熊賜履雪泊東流度歲

水濤雪浪拍孤舟城角悲茄起暮愁飄泊一身慙獻歲萍踪早已付東流

白允謙過東流陶靖節祠

龍門有太史足跡半天下纂輯爲文章潤澤被函夏不

如三徑間遺榮樂耕稼行乞道不辱嗜酒情非詐我來
楚江籬何時返長駕慨歎平生期高風少流亞

陸培北岡牧唱

樓角聽清歌夕陽牛背多牛童縮雙髻緩緩下平坡
夕陽明岡頭高下亂樵牧樵歸牧未還唱歌自誇犢何
必尺八橫清響聽不足

陸培月夜泛江

謝客待吟詩澄江月上時江光蕩圓月碎疊千玻璃
山中吐已佳江上看更好倒影落空潭委波驚宿鳥我
欲伴謫仙攬之入懷抱

陸培登菊江亭望蓮花洲作

亭西望蓮洲只隔一江水晴暉散作霞密樹排如薺不見采香人空羨鴛鴦起

陸培鼃石磯

環磯水琮琤恍若玉琴寫時復相擊撞瞿塘走奔馬誰與疊雲根流杯繼風雅

吳原滙歷山早秋

歷山天氣好巖際一痕秋淡淡風初扇冷冷暑乍秋晴光烘霧雨商意動林邱心跡雙虛曠登高興倍幽
趙青藜作匡廬遊過東流登菊江亭太白樓三首

想望匡廬面目真柴桑吹到曉風馨歸來荒徑壺中綠
留得南山菊外青自笑無腰纏五斗情知有粟不盈瓶
先生豈是耽閑客醉向東籬未肯醒

靖節祠迎供奉樓出塵人共愛江流忘言時酌花間酒
得意閒題水上洲明月清風三徑好晨烟暮靄一亭秋
羲皇下數開元日奕世翩翩臭味投

江流淨滌俗中塵晉士唐仙治比隣但見韶光日沉飲
焉知餘事作詩人編籬野菊猶生愛過檻浮雲倍有神
身後榮名多如此幻從沒泊得其真

孔尚豫遊列疊山

突兀無縫石到來小有天平疇香稻熟曲徑細流穿茅
舍斜通寺山農半講禪坐看新月上空際自鴈鴛

張士範東流道上

幾重烟樹幾重山山外人家綠水灣樵豎牧童歌上下
夕陽影裏自間間

歐陽霞城南晚眺

江城風物舊繁華山色湖光面面遮帆落夕陽何處客
鐘敲明月老僧家漁舟欸乃趨前浦鷗鳥容與篆淺沙
吏散晚衙官市冷獨憑睥睨看烟霞

蔣綬菊江亭懷古志感

我來令東流先生遺前躅焚香坐江亭高風堪彷彿悠然會素心渺茫接吾目古之葛天民忘情學草木東晉義熙末時事多翻覆哲人炳幾先吾道尋卷束辭賦歸去來長謝五斗粟軒冕棲塗泥全真返良璞放浪不碍理幽貞豈絕俗爲吏亦爲惠可久並可述詩載兩牛腰巾脫甕頭漉不遭漁父笑寧訪君平卜閒居戒子篇尾聯吾儕續天運旣如此且盡杯中物天運旣如此更種籬邊菊蕊綻芳菲杯中黃復綠醉飲抱菊眠氤氲同馥郁一枕刊羲皇南窓飯未熟醒來笑黃花黃花信如玉祇同膾炙嗜匪如羊棗獨茂叔亦有蓮子猷亦有竹

寓意非留意退情偶相屬我後千餘年重整案頭牘戴
星常往還忍戀廬山麓彭澤訓農時允爲惠政錄書我
堂座隅朝夕勤三復契古良覲深凜然敬佩服

蔣綬丙子紀旱

東流磽瘠地民命多迍邐上年全省歉蕞壤亦如懸交
春更苦雨陰晦日纏綿泥濘沒蒸蕨比屋乏炊烟我爲
請平糶價減民無錢典鬻衣被盡升斗繼糜餽耐寒兼
忍餓二麥生意延積雨方迴避愆陽又秉權時當五六
月酷暑正炎炎兼旬雲不陣彌月雷絕鞭日色赤如血
霞光爛欲燃金石皆流燂百穀盡熬煎桔槔聲徹夜輾

輶轉山泉疲勞命欲絕饑餒氣自奄我行四野徧蒿目
心惻惻無農國何賦無食民何天計搗早魃窟直搜服
蠶殲齊心痛民瘼疏奏城隍前

蔣綬紀雨

城隍司陰錄與余責並肩協心籲上帝吉語夢中傳迎
巫勅符咒取水歷山巔中宵余徒步敢辭足跡穿壇設
坎方位拜禱禮數虔六月廿八日夜半雷鼓喧凌晨雲
驟布雨來西南邊滂沱隨時足霖霖更霄連蒿萊勃勃
起禾黍油油然憂者於以喜病者於以痊懽聲騰部屋
淑氣溢山川痛定還思痛我意愈乾乾

王念祖香山石巘

晴雲暮靄鎖香龕
山色浮空半紫嵐
梵閣鐘聲聞遠渚
江濤萬頃靜寒潭

何爰然登香山絕頂

間登峻嶺眺晴川
萬里蒼茫水接天
入望眼隨孤雁杳
憑臨身共五雲懸
烟封樹底幽人宅
風送江頭過客船
盡醉不辭浮白滿
光茫飛射斗牛邊

馮士奇菊江晚秋

城邊風景晚江涯
謾說秋殘滿徑花
香褪枝猶凝白露
樹寒葉尙鍊丹砂
魚舟欸乃雙分槳
雁陣零星亂落霞

且向菊臺閒散步烟波茫漾看乘槎

陸壽昌東流卽事

江上青山山外湖湖邊山郭帶平蕪
蒼寒雲樹連秋浦隱約風帆下小孤
菊徑花深宜載酒梅潭魚好莫思鱸
已拚吏隱藏吾拙一任談經笑魯儒

路步蟾東流卽景

耕稼詎釋地居山不辭深雄陶偕績
牙楚然聞足音賃物遠頓卽適合留
桑陰附會鳥敢議聖迹人所歆歷山遺澤
靖節樂高蹈逸情隨物寓秋容在東籬
行行曳芒屨微吟托幽花拈毫灑晨露
人往香仍留徘徊不能去陶逕餘香

葛仙跨鹿去遺跡留千載空山萃草苗呦呦聲如在丹

砂亦可致歲月不相待仙衣棄羅浮化蝶成五采白鹿奇蹤

靈禽孕璞中五德性所慕搏沙撮土成翠羽花冠具高

騫侶鵷鸞栖息傍琪樹不逢羅江東至今未飛去金雞古石

江月映湖水皎如珠在盤羣仙聯袂來天風吹高寒玉

壺鑒皓皓銖衣飄珊珊我來不可見烟水空瀰漫仙湖鮫月

長江挾風力千里恣奔放危磯屹而立其勢不相讓獵

獵驅征帆滾滾駕高浪竭來躋層巔襟懷一爲暢黃石雄風

嶺畔羅長松青翠積如鋪赤日不到地柯葉交長途天

風飄仙籟一一吹笙竽受職能芘蔭何愧稱大夫松嶺清陰

昔愛東坡詩六月下塘春今來涉蓮洲春色尤宜人紅
罪衣瑟瑟翠覆波鱗鱗采采貽所懷意比瓊瑤親

蓮花
春色

黃雲會寄頌蘇侯政

剖竹山城吏欲仙幾年社鼓樂春田美人自起神君頌
稚子能言召父賢江上清風吹渡虎梁間明月照魚懸
一鹽衣帶違顏色隔岸花封印二天